

իջնում է մինչեւ հասարակ գիւղացու աստի-
ճան :

Սասանեան շրջանում ղեհկանը գիւղա-
կան փոքր կալուածատէր ազնուական էր, եւ
երբեմն այնքան աննշան հողատէր էր, որ չէր
տարբերուում սովորական գիւղացուց : Յաճախ
կառավարութեան ներկայացուցիչներն էին
ղեհկանները իրենց տեղերում, որոնց յանձ-
նըւում էր առաւելագլխ հարկերի գանձումը :
Դեհկանի վարչական պաշտօնը մի կողմից եւ
իր անձնական գրութիւնը որպէս գրեթէ գիւ-
ղացի միւս կողմից թելադրում են կրկնակի ի-
մաստ ղեհկանութիւն բառի՝ հարկահանու-
թիւն եւ շինականութիւն :

Փաւստոսի մօտ կարծես գործ է ածուած
որպէս հոմանիշ հազարապետութեան եւ ու-
րեմն հարկահաւաքի իմաստով :

Նոյն հեղինակը հազարապետութիւնը
հակադրում է սպարապետութեան . մէկի տես-
չութեան տակ է գտնուում շինականութիւնը,
հարկատու դասը, միւսը տէր է զինուորական
ոյժերի, եւ գրուիս ազատ դասի, որի պարտա-
կանութիւնը հանդէպ արքայական գահի զին-
ուորական ծառայութիւն էր եւ ուրեմն նրանց
այրուծին կազմ եւ պատրաստ պահելը սպարա-
պետի գործն է :

Արդ՝ եթէ Արչակունի թագաւորը առան-
ձին հազարապետ ունէր հարկերը գանձելու
համար, նա արքայական տան գիւղերի համար
չէր : Այս դէպքում ամէն մի նախարարական
տուն պէտք է իր հազարապետ ունենար, ինչ
որ անհաւանական է եւ որի մասին ակնարկ
չկայ մատենագիրների մօտ : Պետական հազա-
րապետ աւելի լայն շրջանի շինականութեան
համար էր : Եթէ միայն արքայական գիւղերի
տնտեսութեան հսկիչ լինէր, թագի անկումից
յետոյ պիտի վերանար : Այն ինչ հազարապե-
տութեան պաշտօնը մնում է եւ կոչւում է
«հազարապետ աշխարհի» : Եղիշէն աւելացնում
է՝ «իրբեւ զհայր վերակացու համարեալ էր
աշխարհականաց քրիստոնէից», որով հաս-
տատուում է Փաւստոսի խօսքերը թէ հազարա-
պետը հարկատու դասի, աշխարհականու-
թեան, խնամակարն ու հոգածուն էր :

Արչակունեաց անկումից յետոյ պարսիկ-
ները նոր աշխարհագիր են անում, հարկերի

չափը որոշում եւ նշանակում պարսիկ հազա-
րապետ : Նրանց ժամանակ եւ յետոյ պէտք է
ենթադրել որ կար հոծ շինականութիւն, որ
մշակում էր իր բաժին հողը որպէս սեփակա-
նատէր : Կարող ենք անուանել ազատ շինակա-
նութիւն, նրանց գիւղերը vici libri : Մե-
ծամեծ նախարարների, գաւառապետների եւ
գործակալների կից Փաւստոս յիշում է «դա-
սապետք շինականաց» : Սրանք վերաբերում են
հաւանօրէն այս հողատէր շինականութեան
(Գլուխ Գ. 51) :

Պետական շինականութիւնից զատ է կալ-
ուածատիրականը կամ նախարարականը : Կլա-
սիկ հեղինակները մոռալ գոյնեցրով են նկարա-
գրում Իրանի գիւղացիութիւնը :

Ամմիան Մարկելինը հաւատացնում է, որ
պարսիկ ազնուականութիւնն անգամ մահուան
եւ կեանքի իրաւունք ունէր սարուկների եւ ժո-
ղովրդի վերայ : Հեծելազօրի ետեւից ընթանում
էր հետեակ խուժանը մատնուած մշտական
ստրկութեան, addicta perenni servitio, կար-
ծես զինուորական ծառայեր լինէին, calones,
(Amm. 23, 6) :

Աւելի հին պատմիչ Յուստինը բաժանում է
պարթեւ հասարակութիւնը ազատների եւ
ստրուկների, liberi եւ servi (տես մեր Հայաս-
տան Յուստինիանի դարում, էջ 385) :

Անշուշտ գոյնեցրը խտացած են եւ վերա-
բերում են հաւանօրէն ոչ բոլոր շինականու-
թեան, այլ առաւել իշխանական գիւղացինե-
րին : Սրանք իրօք servi էին : Սուսափում
եմ գործածել ճորտ բառը, որը թէեւ հազար-
ամեայ հասակ ունի, բայց մեզ զբաղեցնող
շրջանի նկատմամբ շատ նոր բառ է : Հետա-
քրքրականը հէնց այն է թէ ինչպէս էին կո-
չում հնում այն ինչ որ հետագայում ճորտ էր
ասուում : Բառն ինքնին շատ բան կը պարզէր
գիւղացիների գրութեան մասին :

Նոյն Յուստինը պատմում է, որ պարթե-
ւական ազատները սովորութիւն ունէին պա-
տերազմի տանելու իրենց սերվերին, նախա-
պէս ընտելացնում էին նրան զինական արուես-
տի եւ հեծելութեան :

Կոսկած չկայ, որ խօսքը ազատների գիւ-
ղացիների մասին է : Հայոց մէջ եւս յիշուում է
«ոսմիկ այրուծի», «ոսմիկսպաս գօրք», որ